



Ratar Ralf Henčl je minjeny pjatk zapóslancej Sakskeho krajneho sejma Alojsej Miklawškej a sakske mu ratarskemu ministrej Frankej Kupferej (wobaj CDU, wotprawa) swoju nowu připrawu za wobdźělanje symjenja rozložil. Foće: M. Wjeńka, A. Mič

Wobdźělanje symjenja rozšěrjene

Henčlec ratarski zawod w Lejnje dale wuspěšnje dźěła

Lejno (SN/MWj). Wo štyri wulke sila z cyłkownej kapacitu 3200 tonow je Henčlec ratarski zawod w Lejnje nětko swoju připrawu wobdźělanja symjenja rozšěrił. Po tym zo bě sakski minister za ratarstwo a wobswět Frank Kupfer (CDU) minjeny pjatk w Chrósćicach přeni

zaryw za nowu pěstowarnju sobu wobstaral, dojeđže sej wón do Lejna, hdžež smědžeše rozšěrjenu připrawu zapinyć. Tak wudospołni ratar Ralf Henčl swoju dotalnu připrawu, kotraž bě na městnje stareje hródže lěta 2007 w nowej hali nastala. Lejnanskemu ratarskemu zawodej

je móžno, symjo po žnjach na polu dale wobdźělać, zo hodži so wone bjez zanjerođenjow tak zapakować, kaž sej to kupcy přeja. W Němskej je to nimale 20 wikowanišćow, kotraž symjo jednotliwym ratarskim zawodam dale předawaja. Dalši kupcy su rozbrojeni po wšej Europje. A samo hač do Mongolskeje nětko symjo ječmjena a pšeńcy eksportuja.

Za čas NDR je Ralf Henčl, wuchodźiwši Budysku Serbsku rozšěrjenu wyšu šulu, wučerstwo za chemiju a biologiju studował. Po přewróće pak so wón ze swójbu rozsudži, domjacy ratarski zawod zaso přewzać a najprjedy z rólnistwom započec. Skótna produkcija móhla so pozdžišo přidružić. Mjeztym wšak je so toho wzdał, tak zo Henčlec dźensa 720 hektarow pódy wobdźětuja. Na dwěmaj třecinomaj plahuja žito, a to štyri družiny nazymskeho ječmjena, 13 družin nazymskeje pšeńcy a tři družiny nalětnjeje pšeńcy. Tamny stołp Lejnanskeho ratarskeho zawoda je plahowanje cokoroweje rěpy, na dalšej třecinjje jeho polow. Tu Ralf Henčl tež nowe družiny pospytuje, wšako je předsyda Zwjazka saksko-durinskich plahowarjow cokoroweje rěpy. Dohromady ma w swojim zawodze pjec přistajenych a dalšich sezonowych dźělaćerjow.